

Høyring av verneplan for skog

Mosnapp naturreservat, Fyresdal kommune



Høgstaudevegetasjon i kjerneområde 2. Foto: J.G. Brynjulvsrud

**Fylkesmannen i Vestfold og Telemark
September 2020**

Innhold	side
1. Bakgrunn.....	3
2. Om verneplanarbeidet og frivillig vern.....	3
3. Heimelsgrunnlag.....	3
4. Saksgang.....	4
5. Verneplanen sitt omfang.....	8
6. Faktaark.....	9
7. Framlegg til verneforskrift.....	13

Vedlegg: Vernekart

1. Bakgrunn

Fylkesmannen i Vestfold og Telemark sender med dette på høyring framlegg til vern av Mosnapp naturreservat i Fyresdal kommune.

Bakgrunnen for framlegget er eit tilbod frå grunneigarane i området om frivillig vern av skog. Tilbodet kom i mai og juli 2018 gjennom AT Skog. Det er gjort registreringar av naturverdiane i området i 2018 som dokumenterer verdiar som kvalifiserer for vern etter naturmangfoldloven.

2. Om verneplanarbeidet og frivillig vern

Meld. St. 14 (2015 – 2016) *Natur for livet* legg opp til ei vidareføring av det langsiktige arbeidet med skogvern, mellom anna auka frivillig skogvern. Under handsaminga av meldinga bad Stortinget regjeringa sette mål om vern av både offentleg eigd skog og frivillig vern av privateigd skog til 10 % av skogarealet i landet. Naturfaglege evalueringar som ligg til grunn for prioriteringane i skogvernarbeidet er «*Evaluering av skogvernet i Norge*», NINA rapport 54/2002 og «*Naturfaglig evaluering av norske verneområder*», NINA rapport 535/2010.

Ved frivillig skogvern gir grunneigarane fylkesmennene tilbod om vern av aktuelle område. Det blir gjort naturfaglege registreringar og utarbeidd skogtakster for dei områda der det trengst. På grunnlag av tilbod og dei naturfaglege registreringane utarbeider Fylkesmannen forslag til avgrensing av verneområdet. På grunnlag av tilbod og mal for verneforskrift for naturreservat utarbeider Fylkesmannen forslag til verneforskrift som blir sendt til grunneigarane for kommentarar. Miljødirektoratet utpeikar ein skogsakkyndig som får i mandat å forhandle med grunneigarane eller grunneigarane sin representant. Ved semje blir det utarbeidd avtale der erstatningssum, forslag til verneforskrift og avgrensing av verneområdet blir avklart.

Det vanlege er at når staten og grunneigar er einige om desse punkta vil området gjennomgå vanleg sakshandsaming i tråd med naturmangfoldloven. Etter avtale med grunneigar kan melding og høyring av verneforslag likevel gjennomførast før avtale er signert. Frå avtaletidspunkt og fram til vernevedtak gjeld ei vederlagsordning. Utbetaling av erstatningsbeløp skjer når vernevedtaket er fatta.

3. Heimelsgrunnlag

Vern av spesielle område eller førekomstar skjer i medhald av lov 16. juni 2009 om forvaltning av naturens mangfold (naturmangfoldloven) jf. §§ 33 – 51. I naturmangfoldloven er det gitt heimel for oppretting av ulike vernekategoriar. Vernekategorien naturreservat, som er det strengaste vernet etter naturmangfoldloven, jf. § 37, vil bli bruka for denne verneplanen for skog på privat grunn.

Vedtak om oppretting av naturreservat vert gjort av Kongen i statsråd etter § 37 i naturmangfoldloven, som lyder slik:

” Som naturreservat kan vernes områder som

- a) inneholder truet, sjelden eller sårbar natur,
- b) representerer en bestemt type natur,
- c) på annen måte har særlig betydning for biologisk mangfold,
- d) utgjør en spesiell geologisk forekomst eller

e) har særskilt naturvitenskapelig verdi.

Som naturreservat kan også vernes et område som er egnet til ved fri utvikling eller aktive gjenopprettingstiltak å få verneverdier som nevnt i første ledd.

I et naturreservat må ingen foreta noe som forringer verneverdiene angitt i verneformålet. Et naturreservat kan totalfredes mot all virksomhet, tiltak og ferdsel. I forskriften kan det gis bestemmelser om vern av kulturminner i reservatet.

Treffes vedtak om reservat som krever aktive gjenopprettingstiltak, eller vedtak om reservat der bruk er en forutsetning for bevaring av det biologiske mangfold, skal det samtidig med vernevedtaket legges fram et utkast til plan for skjøtsel for å sikre verneformålet. Planen kan omfatte avtale om bruk av arealer, enkeltelementer og driftsformer. Planen eller avtalen kan inneholde bestemmelser om økonomisk kompensasjon til private som bidrar til områdets skjøtsel.”

4. Saksgang

Formell start på verneplanarbeidet for Mosnapp naturreservat vart meldt 11. juni 2020 med namnet Ystesund.

Det kom følgjande merknader i meldingsfasen:

Riksantikvaren (e-post av 12.06.2020) syner til kulturminneforvaltninga i fylkeskommunen og handsamar difor ikkje saka.

Språkrådet (brev av 29.06.2020) uttalar følgjande:

«Skrivemåten er grei, men namnet Mosnapp vil vere meir dekkande for området, og vi ber Fylkesmannen vurdere det.»

Bane NOR (brev av 09.07.2020) uttalar at planområdet ikkje rører ved jernbanen sine interesser, og dei har difor ingen merknader til planarbeidet.

Landbruksdirektoratet (brev av 17.07.2020) uttalar følgjande:

«Som instans for høyringa av forslag til oppretting av nye naturreservat, ønsker vi å gi nokre generelle innspel til verneprosessen.

Grundig beskriving av området

Av høyringsdokumenta må det komme tydeleg fram om og i tilfelle korleis det aktuelle området blir nytta til landbruksformål. Dersom det er landbruksinteresser i området som ikkje blir tatt omsyn til i utkast til forskrift, ber vi om at det blir grunngjeve i høyringsdokumenta. Typiske landbruksinteresser kan vere (lista er ikkje uttømmende):

- o Skogsbilveg som er naudsynt for skogbruk på tilgrensande areal
- o Traktorveg i samband med jordbruk
- o Støl/seterområde
- o Beite
- o Reindrift

Utforming av forskrift

Dersom det går vegar/ferdselsårer gjennom verneområdet, må Fylkesmannen vurdere om det kan bli gitt føresegn om merking, rydding og vedlikehald av desse. Det bør bli lagt til rette for drift og vedlikehald av eventuelle støl-/seterområde og bli opna for andre tekniske tiltak som bidreg til ein landbruksmessig utnytting av området. Dersom slike tiltak ikkje er ønskeleg innanfor verneområdet, må det bli gitt ei fagleg grunngjeving for

dette i høyringsdokumenta.

Beite vil vere aktuelt i mange område som blir foreslått verna som naturreservat. Det bør difor bli vurdert om forskrifta kan opne for dette. Viss ikkje, må det bli gjort greie for kvifor i høyringsdokumenta. Dersom det blir opna for beiting i området bør det også bli utarbeida føresegn for utsetting av saltsteinar og oppføring/vedlikehald av gjerde og sankekveer.

For alle tiltaka over må det bli vurdert om det kan bli gitt føresegn om motorferdsel i samband med tiltaka. Det bør bli gitt generelt unntak frå føresegna om ferdsl i samband med uttransportering av sjuke og skadde bufe.

Vi går ut frå at Fylkesmannen sin landbruks- og reindriftsfaglige kompetanse blir involvert i utforming av forskrift og verneplan. Det vil også vere nyttig å involvere den lokale landbruksforvaltninga i arbeidet.»

NVE (brev av 22.07.2020) uttalar at det ikkje er nokon konflikt med kraftliner i området og uttalar elles følgjande:

«NVE har generelt ikke kjennskap til nettselskapenes planer for distribusjonsnett, og vi forutsetter at områdekonsesjonærene kommenterer eventuelle konflikter med egne anlegg og planer. Etter det vi kan se er ikke områdekonsesjonærene Vest-Telemark kraftlag AS og Midt-Telemark Energi AS med på høringslisten, og vi ber om at de får anledning til å uttale seg.»

NJFF Telemark (brev av 22.07.2020) uttalar følgjande:

«Så lenge de fremtidige verneforskriftene for områdene ivaretar NJFF Telemark sine interesser, på linje med tidligere verneforskrifter, har vi ingen innvendinger mot oppstart av verneprosessene.»

Direktoratet for mineralforvaltning (brev av 22.07.2020) uttalar følgjande:

«Innanfor det varsla verneområde Ystesund er det registrert ein mineralførekomst (Midtsund)⁶. Det er påvist mineraler av typen basemetall/kobber, men førekomsten sin betyding som framtidig ressurs er ikkje kartlagt. Ut frå skildringar av førekomsten kan ein leggja til grunn at førekomsten er ubetydeleg. Det er òg registrert førekomstar av basemetall/kobber både vest og nord for verneområdet (Hattan og Mosnap). Begge er av Noregs geologiske undersøking(NGU) vurdert å vere av liten betyding. Ved førekomsten Mosnap⁷ er det ei nedlagd gruve. Den var i drift i fleire periodar i tida frå 1691 til 1888. Det er drivefleire store dagopningar, fleire sjakter og to stoller. Markeringar i gult i bilete nedanforviser aktsemdssoner, der dei raude trekantane markerar gruveopningar. Blå linje er vernegrensa.

6) Noregs geologiske undersøking (NGU):


http://aps.ngu.no/pls/oradb/minres_deposit_fakta.Main?p_objid=5564&p_spraak=N

7) Noregs geologiske undersøking (NGU):

http://aps.ngu.no/pls/oradb/minres_deposit_fakta.Main?p_objid=5562&p_spraak=N

Fagleg tilråding frå DMF

Det bør gjerast greie for om det ligg gruveopningar innafor verneområdet, da det kan finnast opningar som per i dag ikkje er registrert i DMFs aktomhetskart⁸. Dersom det er gruveopningar og liknande innanfor verneområdet som kan vere ein risiko for menneske eller husdyr, må det i føresegna opnas for naudsynte inngrep i form av sikringstiltak.»



FYLKESMANNENS KOMMENTARER TIL DE INNKOMNE MERKNADENE

Når det gjeld innspelet frå Språkrådet så følgjer vi oppmodinga om å endre namnet til Mosnapp.

Når det gjeld innspelet frå Landbruksdirektoratet, så vil vi kommentere at området som er planlagt verna ikkje har støl/seterområde, men skulle det vera aktuelt med beitedyr er det tatt høgde for det i verneforskrifta, jf. § 4b og g, § 6a, 7f, h og i.

Når det gjeld innspelet frå NVE så vil vi ta inn Vest-Telemark kraftlag AS og Midt-Telemark Energi AS på høyringslista.

Når det gjeld innspelet frå DMF så vil vi i samband med høyringa spørje grunneigarane om dei kjenner til ukjende gruveopningar. Skulle det vise seg at det finst slike så vil vi taka inn eit punkt om naudsynte sikringstiltak i føresegna.

Nye innspel frå grunneigarsida

Den 10. juli 2020 fekk Fylkesmannen oversendt eit tilbod frå grunneigar Inger Valen på eit areal inn til det arealet som blei sendt ut med oppstartsmeldinga. Arealet ligg på gnr./bnr. 80/1 og omfattar ca. 270 daa. Dette tilbodet er teke med i det samla arealet som no går ut på høyring. Det same gjeld tilbod frå grunneigarane Hans O. Bakke, gnr. 78/3 og Inger Valen, gnr./bnr. 80/1, som tilbyr utviding av sine tilbod. På eigedomen til Bakke utgjer dette 44 daa, og på eigedomen til Valen utgjer det 51 dekar. Totalt er foreslege areal på heile området på 3542,6 daa.

Vidare sakshandsaming

Verneforslaget med skildring av området, vernekart og forslag til verneforskrift blir sendt på ei felles sentral og lokal høyring med frist 25. november 2020.

Føremålet med høyringa er å få fram opplysningar om interesser som kan bli råka av det planlagde vernet.

Etter høyringa vil Fylkesmannen summere opp innkomne fråsegner, kommentere desse og utarbeide ei tilråding om vern til Miljødirektoratet. Direktoratet vil etter dette lage innstilling til Klima- og miljødepartementet og vedtak om vern blir gjort ved kgl. res. av Kongen i statsråd.

5. Verneplanen sitt omfang

Namn	Kommune	Tal på grunneigarar	Totalareal	Verneverdi
Mosnapp naturreservat	Fyresdal	6	3542,6 daa	(*/**) lokal til regional



Reir i furu av kongeørn. Foto: Odd Frydenlund Steen

6. Faktaark

LOKALITET:	Mosnapp
KOMMUNE:	Fyresdal
FYLKE:	Vestfold og Telemark
VERNEKATEGORI:	Naturreservat
AREAL:	3 542,6 daa
HØGDE OVER HAVET:	Ca. 575-937 m.o.h.
EIGEDOMAR:	Gnr./bnr.: 75/3 og 4, 78/3, 78/4, 80/1, 81/2, 81/4

SKILDRING AV OMRÅDET

Lokaliteten ligg mellom Sundsvatn og Mjåvatn og omfattar Mosnapp med tilhøyrande lisider i sør og aust i Fyresdal kommune. Området har forholdsvis variert topografi med kollar og fjell, bratte sør- og sørvestvendte lisider, slakare aust- og nordaust-vendte lisider og myrflater.

Berggrunnen består av kvartsitt i nordre del, medan dei sørlege lisidene består av konglomerat og sedimentær breksje. Lausmassane består i hovudsak av morenemateriale med eit innslag av torv og myr.

Lokaliteten ligg for det meste i nordboreal sone (70%) men dei austre areala kan førast til mellomboreal sone (30%).

VEGETASJON, SKOGSTRUKTUR OG PÅVERKNAD

Området vert dominert av fattige vegetasjonstyper i skog, bærlyng- og lyngvegetasjon dominerer. I høgareliggjande område finn ein ein ganske stor del fattige myrflater og til dels bakkemyrer (myr- og sumpskogsmark). På kollane dominerer grunnlendt lyng- og låglyngvegetasjon, og det undersøkte området inneheld ganske store areal med ikkje tresett impediment og bart fjell, men også ein del tresett impediment. I dei sørvendte lisidene sør for Mosnapp er det likevel ein del areal med rik vegetasjon av type lågurt, samt sparsamt med høgstaudevegetasjon. Gran er det dominerande treslaget i søkk, lisider og areal med eit visst lausmassedekke, men bjørk utgjør også ein betydeleg del. Furu dominerer på koller og i ein del av lisidene. I tillegg førekjem rogn, osp og selje, samt nokre få individ med hassel og alm i sørvendte lisider. Impediment og låg bonitet dominerer området, men det finst parti med middels bonitet aust og vest i området.

Eldre skog dominerer undersøkt område, men det inneheld også områder av yngre hogstklasser. Store areal består av gammal granskog, og i ein del lisider lysåpen til glissen furuskog. I lisidene i aust og sør finn ein forholdsvis små og få areal med særlege mengder av dødt virke i granskog. Det er einskilde dødvedrike parti i furuskogen sentralt i området, og eit fåtal brannstubbar vart registrert. Samlet sett førekjem kontinuitetsberande element i relativt liten grad i området.

VERNEINTERESSER

I dette avsnittet er mellom anna såkalla «raudlista» artar omtala. Det er artar som er sjeldne og som er gitt ulik status etter kor stor fare det er for utrydding. Status er henta frå Raudlista 2015 frå Artsdatabanken. VU = sårbar, NT = nær truga, der «sårbar» er meir sjeldan enn «nær truga».

Innafor avgrensa verneverdig areal dominerer fattig homogen vegetasjon, ein finn difor ein relativt einsarta karplanteflora. I dei sørlege lisdene er det likevel parti med rikare vegetasjon, og ein del basekrevjande artar som tysbast, breiflangre, taggbregne og kransmynte finst i desse områda. Dei rikaste områda er i hovudsak fanga opp i kjerneområde 1. Det vart avgrensa to kjerneområde innafor avgrensa verneverdig område, dei dekkjer ca. 3 % av samla areal.

Av raudlista artar vart alm *Ulmus glabra* (VU), gubbeskjegg *Alectoria sarmentosa* (NT) og svartsoneskjuka *Phellinus nigrolimitatus* (NT) påvist. Svartsoneskjuka og gubbeskjegg er knytt til ein viss grad av kontinuitet, men potensialet for fleire krevjande artar knytt til kontinuitet vurderast som lite som følgje av at kontinuitetsberande element førekjem spreidd i lokaliteten.

Fylkesmannen kjenner til fleire interessante artar innafor det føreslegne vernearealet. Fleire av desse er raudlista og hekkar anten innafor verneforslaget eller i nærleiken til området. Det gjeld mellom anna bergirisk (NT; antatt hekkefugl), gjøk (NT; antatt hekkande), gulspurv (NT; antatt hekkande), lirype (NT, hekkefugl), taksvale (NT; hekkar i nedre bergdel innafor verneforslaget), hønsehauk (NT; hekkar truleg i austre del av verneforslaget) og sivspurv (NT). Kongeørn har to reirplassar her og har hekka jamleg opp gjennom åra, seinast i 2017 i et stort reir i furu (sjå eige foto). Lokaliteten inngår i den intensive overvåkinga av arten i nasjonal regi, og hekkeforløp er lagt inn i Rovbasen sidan 2013. Kongeørn er ikkje på raudlista, men er ein forvaltingsmessig interessant art som ein meiner har ein stabil bestand i fylket.

I området er det også kjend at det har hekka lavskrike, og den er observera i området så seint som i 2020. Det er difor truleg at den framleis er etablera som hekkefugl i området. Dette er den vestlegaste kjende førekomsten av arten i fylket. Næraste kjende hekkeførekomst er i Hjartdal kommune. Lavskrike er ikkje raudlista, men i ein nyleg publisert artikkel om utbreiinga av arten kjem det fram at den er i tilbakegang i tidlegare viktige leveområde i Telemark.

Ein annan fugleart som er registrert hekkande innafor verneforslaget er varsler. Hekkefunn av denne er sjeldan i fylket, og det er noko usikkert kor stor hekkebestanden er i Noreg. Varsler er ikkje raudlista (var raudlista i 2010; nær trua).

FØREMÅL

Føremålet med naturreservatet er å taka vare på eit område som har særleg verdi for biologisk mangfald på grunn av førekomst av høgareliggande lågurt-granskog og eldre furuskog rik på død ved og til dels med brannpåverka parti.

Området har særskilt naturvitskapeleg verdi på grunn av førekomst av alm og sjeldne og truga artar av sopp og lav.

ANDRE INTERESSER

Ingen kjende.

TEKNISKE INNGREP

Ingen kjende.

PLANSTATUS

Arealet er sett av til LNFR-område i kommuneplanen sin arealdel.

MERKNADER

Vi kjenner ikkje til stigar med vidare i området.

SKOGBRUKSOPPLYSNINGAR

Namn	Total-areal daa	Produktivt areal i daa				Anna areal i daa			Tilvekst m ³	Volum m ³
		H	M	L	Sum	Myr	Vatn	Imp.		
Mosnapp naturreservat	3542,6	113	813	1534	2460	272	18	809	0,21	30830

LITTERATUR

Brynjulvsrud J. G. 2019. Naturverdier for lokalitet Ystesund, registrert i forbindelse med prosjekt Frivilligvern 2018. NARIN faktaark. BioFokus.



Sørvendt lyngfuruskog med ein del død ved vest i området. Foto: J.G. Brynjulvsrud

7. Framlegg til verneforskrifter

Kommentarar til forskriftene

Bruk av naturreservatet til idrettsarrangement eller andre større arrangement er forbode.
Definisjon på større arrangement er omlag 30 deltakarar. Er det fleire deltakarar må det søkjast om løyve, og då kan forvaltningsstyresmakta vurdere dette i høve til § 7 pkt. e.

Vedlikehald av bygningar, vegar og andre anlegg og innretningar i høve til tilstand på vernetidspunktet

Aktuelle bygningar, vegar og andre installasjonar som finst på vernetidspunktet blir vanlegvis teikna inn på vernekartet.

Motorferdsel

Motorferdsel er forbode etter § 5 pkt. a. Det er nokre generelle unntak i § 6 og det kan gjevast dispensasjon etter søknad etter reglane i § 7.

I tillegg gjeld lov om motorferdsel i utmark, det vil seia at kommunen og grunneigar må gje løyve til motorferdsel på vanleg måte.

Bruk av sykkel, hest og kjerre og ridning

I naturreservat er bruk av sykkel, hest og kjerre og ridning vanlegvis berre tillate der det finst vegar eller stigar.

Merking, rydding og vedlikehald av eksisterande stigar, løyper og gamle ferdsselsvegar.

Det kan etter søknad gjevast dispensasjon etter § 7 pkt. b til rydding og vedlikehald av eksisterande stigar, løyper og gamle ferdsselsvegar. Dette er ein standard regel vi har med i alle verneforskrifter, og som kan nyttast dersom det viser seg å vera stigar ein ikkje har kjent til ved vernet.

Brenning av bål.

Det er vanleg at det er opna for brenning av bål i store reservat (grense på om lag 700 - 1 000 daa). Ein må då nytte tørrkvist eller ved ein har med seg, ein kan ikkje felle eller hogge opp daude tre.

Forslag til forskrift om vern av Mosnapp naturreservat i Fyresdal kommune i Vestfold og Telemark fylke

Fastsett ved kongeleg resolusjon med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34 jf. § 37 og § 62. Fremma av Klima- og miljødepartementet.

§ 1. (føremål)

Føremålet med naturreservatet er å ta vare på eit område som har særleg betydning for biologisk mangfold på grunn av forekomst av høgareliggande lågurt-granskog og eldre furuskog rik på død ved og til dels med brannpåverka parti.

Det er ei målsetjing å behalde verneverdiane i mest mogleg urørd tilstand, og eventuelt vidareutvikle dei.

§ 2. (geografisk avgrensing)

Naturreservatet omfattar følgjande gnr./bnr.: Fyresdal kommune: 75/3 og 4, 78/3, 78/4, 80/1, 81/2, 81/4.

Naturreservatet dekker eit totalareal på ca. 3542 dekar. Grensene for naturreservatet går fram av kart datert Klima- og miljødepartementet Dei nøyaktige grensene for naturreservatet skal merkast av i marka. Knekkpunkta skal koordinatfestast.

Verneforskrifta med kart blir oppbevart i Fyresdal kommune, hos Fylkesmannen i Vestfold og Telemark, i Miljødirektoratet og i Klima- og miljødepartementet.

§ 3. (vernereglar)

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a. Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp medrekna lav eller delar av desse frå naturreservatet. Planting eller såing av tre og annan vegetasjon er forbode.
- b. Dyrelivet, medrekna reirplassar og hiområde, er verna mot skade, øydelegging og unødig forstyrring. Utsetting av dyr er forbode.
- c. Det må ikkje setjast i verk tiltak som kan endre naturmiljøet, som til dømes oppføring av bygningar, anlegg, gjerde og andre varige eller mellombelse innretningar, parkering av campingvogner, brakker e.l., opplag av båtar, framføring av luftleidningar, jordkablar, kloakkleidningar, bygging av vegar, drenering eller anna form for tørrlegging, uttak, oppfylling eller lagring av masse, utføring av kloakk eller anna form for forureining, etterlating av avfall, gjødsling, kalking eller bruk av kjemiske utryddingsmiddel. Forsøpling er forbode. Opplistinga av tiltak er ikkje uttømande.
- d. Bruk av naturreservatet til større arrangement er forbode.

§ 4. (generelle unntak frå vernereglane)

Vernereglane i § 3 andre ledd er ikkje til hinder for:

- a. Sanking av bær og matsopp.
- b. Beiting.
- c. Jakt, fangst og fiske i samsvar med gjeldande lovverk.
- d. Oppsetting av mellombelse mobile jakttårn for storviltjakt.
- e. Felling av store rovdyr i samsvar med gjeldande lovverk.
- f. Forsiktig rydding av små buskar og kvist på postar i samband med jakt på storvilt.

- g. Utsetjing av saltsteinar.
- h. Brenning av bål med tørrkvist fra bakken eller ved ein har tatt med, i samsvar med gjeldande lovverk.

§ 5. (regulering av ferdsel)

All ferdsel skal skje varsamt og ta omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a. Motorisert ferdsel på land og i vatn er forbode, medrekna landing og start med luftfartøy.
- b. Sykling, riding og bruk av hest og kjerre er forbode.

§ 6. (generelle unntak frå reglane om ferdsel)

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulanse-, politi-, brannvern-, rednings- og oppsynsverksemd, og gjennomføring av skjøtsels- og forvaltningsoppgåver som er fastsett av forvaltningsstyresmakta. Unntaket gjeld ikkje for øvingsverksemd.

Ferdselsreglane i § 5 andre ledd er ikkje til hinder for:

- a. Naudsynt motorferdsel i samband med uttransport av sjuke og skadde bufe. Køyretøy som nyttast skal vere skånsame mot markoverflata. Det skal gjevast melding til ansvarleg oppsyn for verneområdet i forkant av køyring.
- b. Naudsynt uttransport av felt elg og hjort med lett beltekøyretøy som ikkje set varige spor i terrenget.
- c. Landing og start med Forsvaret sine luftfartøy.

§ 7. (spesifiserte dispensasjonsreglar)

Forvaltningsstyresmakta kan etter søknad gje dispensasjon til:

- a. Tiltak i samband med forvaltning av vilt og fisk.
- b. Merking, rydding og vedlikehald av eksisterande stiar og gamle ferdselsvegar.
- c. Hogst av etablerte plantefelt.
- d. Istandsetting, vedlikehald og skjøtsel av kulturminne.
- e. Avgrensa bruk av naturreservatet for aktivitetar som nemnt i § 3 d.
- f. Mellombels gjerding i samband med beiting.
- g. Øvingskøyring for formål nemnt i § 6 første ledd.
- h. Uttransport av felt elg og hjort med anna køyretøy enn lett beltekøyretøy som nemnt i § 6 andre ledd b.
- i. Naudsynt motorferdsel i samband med aktivitetar etter § 4 g og § 7 a, c, d og f.

§ 8. (generelle dispensasjonsreglar)

Forvaltningsstyresmakta kan gjere unntak frå forskrifta dersom det ikkje strid mot formålet med vernet og ikkje kan påverke verneverdiane nemneverdig, eller dersom omsyn til tryggleik eller til vesentlege samfunnsinteresser gjer det naudsynt, jf. naturmangfoldloven § 48.

§ 9. (skjøtsel)

Forvaltningsstyresmakta, eller den forvaltningsstyresmakta bestemmer, kan setje i verk tiltak for å oppretthalde eller oppnå den natur- eller kulturtilstanden som er formålet med vernet, jf. naturmangfoldloven § 47.

§ 10. (forvaltingsplan)

Det kan utarbeidast forvaltingsplan med nærare retningsliner for forvaltning av naturreservatet. Forvaltingsplanen kan innehalde nærare retningsliner for gjennomføring av skjøtsel.

§ 11. (forvaltingsstyresmakt)

Miljødirektoratet fastset kven som skal vere forvaltingsstyresmakt etter denne forskrifta.

§ 12. (iverksetjing)

Denne forskrifta trer i kraft straks.



Lavskrike. Foto: Jarl Kjetil Johnsen